



Youth Power Lunch 2008 un éksito rotundo

Youth Power Lunch 2008, un inisiativa di Merkado di Estudio i Profeshon bou di ouispisio di Kámara di Komersio i Industria di Kòrsou, tabata un gran éksito. E studiantenan ku a slag mas mihó i e studiantenan mas ehemplar a gosa di un almuerzo ekstenso den e Penthouse di Hotel Plaza. Tabatin kòmbersashonnan animá na e mesanan ku e "role models" i e spònsernan ku tabata presente.

E almuerzo, ku a tuma lugá djabièrnè pasá dia 4 di yùli, a keda introdusí pa e presidente di Kámara di Komersio i Industria, Ruud Thuis. Señor Thuis a felisitá e studiantenan ku nan logro i a deseá nan éksito ku e 'kompetensha' den e aña eskolar nobo.

Despues di e introdukshon a sigui spichnan di Cedric Sprock di Café Barista i di e "keynote speaker", Rústico de Jesus, direktor finansiero di ddFoodsolutions na Miami. Tantu Sprock komo De Jesus a toka e tema di e almuerzo i e Merkado di Estudio i Profeshon, esta TheYoung Entrepreneur (E Empresario Hóben). Sprock a enfatisá ku afan pa kalidat ta mas importante pa éksito ku poseé hopi sèn. "Si bo tene esei bo dilanti lo bo tin éksito. Bo mester ta ambisioso, sosial i optimista, i bo mester tin un vishon kla. Sòru pa bo tin un bon plan. Sea bo bira un empleado òf un empresario," Sprock a bisa.

De Jesus tambe a papia tokante di kondishonnan pa éksito, despues ku el a elaborá un tiki riba historia di e empresa kulinario ku el a lanta na Miami huntu ku un grupo di yu di Kòrsou. De Jesus, kende ta un èks-alumno di Radulphus College a bisa ku, si bo ke tin éksito den bida, bo mester disponé kontinuamente di inteligensia, dedikashon i hopi gana di traha. ddFoodsolutions entretantu a bira un suministradó importante di kumindanan pa "microwave", dietanan i menúnan kompleto pa restorantnan na Merka.

Un di e puntonan kulminante di e "fundraising lunch" tabata entrega di e Coca-Cola Scholarship pa Myrthe Verhulst, mèneder di merkadeo di Curaçao Beverage Bottling Company. E beka a keda otorgá na Janella Mook, ken a kaba di risibí su diploma na Frater Aurelio SBO. Mook a risibí e beka pasobra el a sa kon pa kombiná su tareanan komo mama di un yu hòmer di shete aña ku un estudio. Di e forma aki Coca Cola ta dun'é e posibilidat pa sigui un estudio di accountancy na Universidat di Antia.

E Youth Power Lunch a wòrdu hasí posibel pa e spònsernan Rotary Club Willemstad, Korpodeko, Curaçao Beverage Bottling Company, Maduro & Curiel's Bank, KLM, Irvita i Quena Plant Protection, Bistro Le Clochard, Ennia, Aquallectra, RBTT, Fatum, Total Services, CHATA, El Tributo, New India Assurance, Spigthoff Advocaten en Belastingadviseurs, Wasserij Korsow, Café Barista, Hotel Plaza i Kámara di Komersio i Industria di Kòrsou.

Rekoudashon lo bai pa organisá aktividatnan di e di 15 Merkado di Estudio i Profeshon dia 12 i 13 di novèmber na World Trade Center. Ya ku e almuerzo tabata eksitoso, lo bolbe ripitié den e temporada ei.